

銅梁山人詩集

銅梁山人詩集卷第五

渝江王汝璧鎮之

鞠影

南山倒景見斜陽忽忽風吹黯淡粧不畏霜殘偏
傲月微嫌秋晚卻無香傳神似解騷人韻對舞還
宜酒客狂潑墨幾時留點黼眼迷朱碧總茫茫

蕎花

近如積雪遠如波天淡雲閒秋氣和繡隴香風先
宿麥野田儉歲補嘉禾珊瑚莖小立禁雪露玉蕊平
鋪勝疊羅辛苦冬春纔一飽平津脫粟意云何

冬至後九日同人集魚門寓齋分體得五言

古詩一首

南至晷影長初候兀圖索陽復信在中朋來會如
約舊傳九九歌古風似幽樂吾儕獨何能無事此
醕醪散直如放參差期先晝諾尋常剪蔬韭餽飮
雜脾臄鴟夷大如壺窠尊小盈勺周巡迴斗杓噓
吸通橐籥要從酒旗斜直到犁星作今年冬較暖
不飲寒已卻梅花未之思玉笛何愁落凍痕微溜
侵雪意高雲閣近遊悅蒼松舊夢感紅葯憶別關
河長引袂風雲拓良會今在茲古歡尙其略諸君

皆文雄奇骨高峩峩而我坐忘言久已遺糟粕可笑嗜好殊土炭病纔著殷勤愛景光買春待春酌向壁燈熒熒打牕雞脯脯轉惜離筵多迴腸九盤攪

分體得七言律二首

空雲朶朶去來頻散豈無蹤聚有因別後纔添三日雪座中仍是九秋人自重陽賦詩又三月矣寒催疊鼓初迎臘花泛清尊已綻春底事瞿瞿愁歲暮送窮酒脯亦能神

同龕彌勒度殘年此日來叅玉版禪得少安閒都

是佛無多禮法豈非仙文章到老纔知重酒醴于
今亦有緣料理新詞過三九玉梅花上月初圓向
陳檢討玉梅花下交
三九詞因用其語

集南雷小酉山房觀趙文度畫山水冊爲題
長歌

昔者香光寶愛巨源畫四源乃以名其堂厥甥趙
左得家法曹溪滴水同辦香茲圖山水十五幅流
傳西澗藏東陽出藍豈獨過先輩雲煙一氣收混
茫經營意匠不可執化工八手人何方千山萬山
杳欲絕只有墨氣無青蒼荒茅古柳莽蕭瑟時見

孤艇來低昂白雲高嶺自游衍西風野渡何蒼涼
人間到處有此境山人樂志行人傷平生汙漫喜
奇奧陰巖邃谷窮搜敷建瓴岷江下井絡挂席渤
澥探博桑一泓九點孰皴染解衣槃礴徒旁皇家
山萬疊古錦張吞吐海若驅雲將松風閣下小茅
屋岩渠秀綠浮銅梁坡圖注目不得語仇池一點
眞吾鄉此中寂寂有至理使人意消還坐忘不知
幽澹入心骨轉覺奇險無文章我不能畫會畫意
厯厯諸境皆心嘗置身邱壑那易得圖中人兮與
子聊相羊

南雷齋中送鄒西麓侍御同年歸江右省覲
余爲賦鶴南飛時值東坡生日後一日也

鶴南飛玉笛杳杳吹江梅大哉仙人去何之今日
爲賦鄒子歸鄒子矯矯雲中姿心骨粹白無瑕疵
齊年與我好兄弟有如珠樹之連枝瀛州清高省
垣近鸞翔鳳翥肩相差看花衮衮十八載天桃穠
李何紛披春風墮粉結松子一笑不覺蒼髯滋別
來又三易草木乍見黃色浮雙眉謂言有母晨昏
違握蘭時殷南陔思白雲孤飛子舍遠歸夢早落
寒江湄北堂歲月自天錫三春寸草皆恩暉羣公

色動亟勸駕壯其行也爲歌詩相思未要折楊柳
琳瑯錦字書萊衣賤子太息重嗟唏感君之行我
涕洟送君潔白歸庭幃斷蓬似我終何依歡場兀
爾作苦語毋乃違俗驚怪辭衝風鶴羽去莫遲江
鄉日暖春熙熙祝母頤壽無窮期人生此難餘可
祈嗚乎人生得此餘何祈

題東坡書文與可畫竹記墨跡

書堂風雨感斯文鬱屈拳蚪抱古分想見淨因方
丈裏兩叢苦竹上捎雲

鳳泊鸞漂八百春文章交道豈無神由來正直能

千古子墨何曾會重人

分賦盆梅得五律四首

春意暗侵尋屏山月有陰疏花寒側側孤夢遠情
惜影與釵檠瘦香依癭几深綠華無定在淡絕小
煙岑

牕靜含虛白樓寒下夕陰一枝勤護惜鎮日費沉
吟渲染冰霜色低徊鍊石心莫煩啼翠羽小立看
橫參

頰頰愁如許犀帷逗篆煙花甃溫似玉苔石小於
拳驛使何勞寄春風此獨偏曉寒閒炙研袖手與

延緣

獨坐成相憶江村欲雪天高花不可卽孤致與誰
傳健步移難得嬌雲此自憐何時圖縮本小玉對
嬋娟

魚門索題所藏歸樵圖得七古一首

衝煙去鳥投崆峒寒飈獵獵來打牕書堂忽作五
里霧荒塗只尺昏星黦參天古栢拔地起蚰蟻肩
鼉龍文扛兩峯沉沉黑如漆天半瀕洞翻濤瀧百
圍之竅眾號怒吞嚼百怪驅夔邶巨靈夸蛾撼不
動童童羽蓋浮青幢人間異境乃有此敲火索照

心魂懣伊誰負戴者二子連脰結腳衣敝襠黽
飛絕藜藿逕更無人處來雙雙得非盧敖與若士
相與汗漫歸鴻龐不然巢居老木客蒙頭薜荔攀
蘅芷燐風土雨莽森索越越卷地誰聞蹙比肩之
民自太古其人朴野多厚疋欲往從之不得路意
行兀兀依枯椿金華道士去已久怪石礪礪空羊
腔神仙綽虐定何似爛柯棋局知誰降先生程子
輾然笑罔兩問景何愚癡畫師已不著名姓如彼
蟬蛻遺螻蛄仙家歲月在人世豈必躡景尋空徑
青城巴嶽惟子宅黃山句曲皆吾邦便因樵子覓

歸路結巢石室開耕糗

南雷出示所藏查他山先生藏山研魚門詩
先成因次其韻

硯背有銘並識康熙戊辰梁荊亭贈今初
白集中所謂紫玉研者是也乾隆戊寅初
白孫昌禱以贈沈椒園先生先生於查爲
門弟子有長歌以紀顛末

研出於梁藏於沈紫玉當年名藉甚敬業老人不
可追一詩一銘如碎錦沈家阿翁欣得之函丈留
貽斯逸品師承所自翁爲傳手澤之遺子尤凜及

今風雅歸儀曹茲研從茲秘諸枕母規而斲璞不

雕

用銘語

三三鍊畫邊旁鋟三先生去已歷年戊辰

戊寅百餘稔人生安得如石堅石丈無言哭諸寢
前身彌勒龕長留舊雨陶泓墨猶瀋金聲玉德古
義存對此敢矜文字飲山可藏兮石可耕豈獨良
規思所稟長歌雜誦欽前徽岫嶺高文齊石廩

敬識 先中丞公遺研卽次魚門編修韻

先府君藏端溪研七皆有銘識嘗與寮佐云

吾生平所蓄止此以貽六子一孫時汝璧

初生卽授此硯名曰玉脂今寶藏四十餘

年追維先澤不勝哀感云

青花紫暈生靈山山靈秘鐫塵緣慳家珍此研特
秀絕不與凡石同寬頑嘉名肇錫覽揆日玉肪古
采連瑤環相依文祿厯閩越水仙霞珮何珊珊維
時行篋研有七獨此堅白尤靜嫺銘辭題字燦珠
斗鳳味龍尾皆從刪斧柯眞人世莫見上巖飛夢
餘琤潺可憐孤露始周晬淚眼灑血星紋殷蕭然
那得四壁立只有片石留寰間後來葛帔走江海
石公助我文煊爛摩挲精魄出光怪庚辰鐵骨誰
能彎自緣守靜久逾潤

銘云守之以靜斯無忒

開函嫩碧如

蘭蒿吁嗟墨守四十載遺編未續慚馬班巴山瓏
璵眉月白字水屈曲瓊江灣何時載書卻歸去紫
雲頽頽同飛還

集駐萍秋舫觀錢澗三作修禊圖率題長歌

一人長鬣疏眉龐獼黏竹素花滿腔美人蔓草遺

音楚先生邂逅吾心降

程魚門編修

一人長頸而短褶

雄文驚坐凌空鏗邈然握管言不哢蒲牢欲吼鯨

魚撞

陳伯思農部

兩人對舉杯橫扛沈前

南雷儀部

錢後南

通參

堆甕甌滑稽大腹皆降肛誰能一口吸老龐蹲

者一人俯逝淙竹竿嫋嫋波澁澁釣鼈不去窺魚

在眼前便似曲水瀧煙萍點點浮輕艫

任子田有祠部

有

一人兮兀且躩柳生兩肘憑枿椿嗒然忘我視若

睨浮沉陽鱗來幾雙濠梁之樂真愚憇

據柳而觀者余也

此六子者非一邦燕吳楚越滇印駝權與雪屋圍

冬釭塼篋靴鼓榻與桎咀嚼金石日擊撻及茲襖

飲攀蘭茫忘歸不覺城鼓辭竹栢峭蒨煙冥黠春

星正正垂天杠誰圖眾相如佛幢錢唐錢叟其名

江

錢南園通參爲余畫栢馬作栢馬歌

百園老栢一匹馬問君畫此爲何者不嘶不動馬

如龍翕絕電尾騰風鬚栢根非石柯非銅天生木
強盤虛空此栢住世幾歲月是否周時漢時物華
陰廟裏曾見之比似輪囷更奇崛此馬不是渥洼
馬或者滇池與果下世間何處無瑰奇按圖而索
甯非假畫馬要得馬性情畫栢便似蒼虬精權奇
蹙縮志超忽蚴蟻膠轕氣鬱律其古在骨駿在神
栢可以悅馬可馴馴之悅之存乎人各適其適還
其眞栢可生肘馬喻指豈論山間與平地韓蘇聲
牙聊爾耳齊與不齊皆物理固哉公孫龍子莊周
子

南園太常爲予作栢馬圖旣題長歌錢叟澍
三復寫予像再題一首

噫噉尺幅中似非栢馬意置我於其間毋乃更無
謂馬曰子非馬詎會腹中事老栢復嗒然眾竅自
號吹栢馬可貌取而我未必似似我亦奚爲如此
栢馬是方無栢馬時無可以思議馬旣爲一心栢
亦爲同氣衍然一拳石風骨更嶙嶭獨抱太古姿
坐壓空雲勢栢馬與我三我與我非二誰知堅白
石與我復爲四題作四友圖莫逆笑相視

伯思見示先宮詹未齋先坐山居課子圖率

題五古一首

烏虜一經遺舊壁餘素風伯思抱此軸不翅治與
弓詹事方閒居繪此一畝宮蕭然几杖外老桂松
栢桐二子美如玉低頭搜古蟲語以人間事塞兌
閉厥聰北方學貴篤不以名爲傭藿逕無人過金
石聲在空三蘇昔出蜀抵掌誇文雄汲汲事走謁
頗笑編禮公苟非傑魁人口實貽兒童不如此老
子孤罷坐深叢繫此雙麒麟閟畧窮山中煙嵐與
皴皴風雨爲磨礪在陰和鳴鶴于野聞鼓鐘自然
鱗鬣成擊水騰風颺後來收科第如獲菹與穉文

章典型在氣勝由中充至今北學者歛手推正宗
吁嗟四十載歲月如飄蓬仲思歿已久伯思成禿
翁勤拳食舊德家學逮虎熊聯翩犀角兒發軔遊
黌雍伯思子豫熊仲思子炳虎新歲入泮怡然召揖客二子辟咷從
視今若視昔洛誦猶前蹤析薪重負荷養正觀童
蒙古訓爲菑畚耒耜傳先農乃知經術家貽厥眞
無窮

同人相訂曉遊城南觀荷雨阻不果晚集南
雷寓齋余又以病不赴聞南園亦未與用昌
黎曲江荷花行韻呈諸公和之

連陂潦水何時淨有似浮塵湫明鏡可憐清絕弄
珠人小立亭亭自端正蝦蟆叫徹嚴更六夢雲遮
斷看花目風裳水佩空娑娑舊雨不來今雨多流
萍忽聚到秋舫駐萍秋舫南雷齋名此中豈可無我歌咫尺
相望隔千里維摩病倒天花裏錢郎何事亦未來
既非齋禁奚停杯解衣槃薄也不惡酒酣起舞頑
雲開就令閉門十日雨還期裏飯相趨陪

魚門見示觀陸澄湖山水卷及飲豐潤酒詩

繼作七律一首

披圖喜見大江橫小酌還思湏水清好句似從天

外得秋雲已向眼邊生
顧余止酒同元亮
羨子懷鄉若季鷹
挂笏看來殊不惡
嘗茶共賞亦多情

同魚門子田秋浦集伯思齋中和魚門韻

一片魚雲澹欲波
疏星影幾人
過不辭近局清
遊數祇恐他時別
思多長得官閒身
老健未妨酒薄飲
微醺祝君蔗境嘗
初味

昌黎詩初味猶啖蔗

莫漫秋衣

製薜蘿

集南雷食研齋豆棚下用平分字爲韻各賦
長律二首時南園伯思奉命視學楚黔余

亦將出守鉅鹿魚門乞假爲秦豫之遊遂還

江淮矣

比似藤花倍眼明
西風拂拂晚煙清
疏籬小徑自秋色
萬里長空多鴈聲
泥飲且酬場圃願
忘機久任桔槔平
賦詩便請歌烹菽
研瘠何妨此代耕

圖中鶴友舊同羣
徙倚高秋酒半醺
慷慨離聲生薊樹
沈寥遠思入湘雲
美人他日在天末
涼月今宵來夜分
珍重心期論贈處

上聲

好風香界有聲聞

送魚門之青州用昌黎遊青龍寺韻索諸公
和之

巷陌西風吹急管
長亭柳枝何短短
空外飛鴻去

已多眼前離思紛吾滿何人束帛招先生岱雲馬
首如傾傘一泓溟渤圓如杯雨點金焦浮似卵衝
煙便以其髯飛齊魯淮徐青不斷回頭爛漫三十
年耨剗焦拳研枯旱債家徵利饑虎耽鬱悶難消
茶七盃揚州屋舍今賤不水石親情語非誕

以上四句

皆用玉川語

從今衣食能鹿酬春秋書傳好排纂名山

事業不可量得失何須借籌算

君有春秋尚書傳注尙未脫稿羨

君此去佳復佳嗟我小生失強伴一年裙屐觀過

從肝肺槎枒煩滌澣豈惟鉛槧相因依更令鶩駘

起疏懶陳黔錢楚先驅馳

伯思如黔南圓之衡湘別去半月矣

君去

江鄉獨蕭散圖中六鶴今分飛浩蕩霜天岐路坦
不辭酒戒爲君開只愁笑口從今罕脫御老驥長
鳴嘶回顧其羣話情欸遲予大鹿來相迎黍谷還
期吹律暖魚門長至後北還卽由秦豫
歸淮計予當在鉅鹿相見掀髯起舞
眞絕倫妙論恢恢如導窾華蓮嵩樹多逢迎有約
山靈未宜緩

景穀江考功見示近作卽用其題雪溪待渡
圖韻賦贈

今夕星斗光突見鯨波涌鶴廳久無文景子獨孤
竦吏才世所稱學力我獨重百一斯爲收晨夕喜

接踵全壩案牘膠流水車輪洶撲緣鴈鷺羣失笑
舉比擁對坐口御箝畫諾手捫膝西山送新爽退
食茲薄奉眾生塵勞中有此讀書種新詩何庚庚
老菊亦甬甬秋室鬼神入商氣毛髮悚裂竹飛孤
鷗破石得珍珙冷澁韓孟爭皴皴冰雪壅虬鐘鱗
始作雷鼓革用鞏羨君得神似而我笑心捧病尻
磨風輪禿鬢落翠氍毹焉月魄斜兀爾山肩聳從
茲富酬贈亦以豁煩冗斯道誠難能退筆空似壟
看君五色絲獨繭已成蛹

癸卯十月

汝璧

將赴順德任魚門編修書昌

檢討南雷儀曹穀江考功子田儀部秋浦侍
御各賦詩餞送并倩申明經叔泮繪九客圖
彙爲一冊時南園銀臺伯思水部奉

命視學楚黔去已匝月魚門亦假歸江淮余爲五
言古詩一篇卽以錄別

聖門昔二子贈處何溫恭人生貴離別友道於斯
崇夫何遠唐棣敢誰忘角弓信美斯必合當別時
還逢韓公逐東野騁望飛雲蹤李生師太華大坐
心忡忡空秋無因依星辰各西東丈夫苟一心九
派同朝宗嗟余亦何幸推輓煩羣公贈言重金石

勛德如圭琮豈惟譬欬親直以形影從於茲蛩附
蜚奚似虵憐風衛人申叔者妙手得化工槃薄爲
斯圖一一探心胸或悅如老栢或鬱如喬松或奇
若篆鼎或古如鯨鐘或縝密以栗或擁腫而豐錢
郎去衡嶽劈地搏芙蓉陳子之黔江舉瓢酌濤瀧
亦復鈎其神與我相鞠恭昨夜風色繁復有南飛
鴻青山圍白鬚黃葉吹烏篷此別最堪念令我心
魂忪掀髯一笑粲老健能春容五君住京國三子
皆南邦叶惟晉有大藪乃在天之中以予廁其間
俯仰眞罍空左顧攬淮楚右瞰窮盧龍遊神矚高

霞頡頏聯珮琤殷勤惜此會嘉會無終窮請看鉅
鹿野突兀堆九峯

題秋林讀易圖

蔣敬之五兄甲午入都謁選以茲圖索題因
循未就後各以憂歸今十年矣癸卯三月敬
之復來京師補官保陽率題二絕句還之

楓天聚地契幽尋鳥去雲飛得會心他日小黃看
報最四千卦影在秋林

重逢塵海仍三月假我空山又數年補鄭刊王師
說在要從實力悟真詮

子亦有空
山讀易圖

銅梁山人詩集卷第六

渝江王汝璧鎮之

居來集

居來者銅梁邑中之山也王鎮之外舅自哀其所著詩逸玉脂山房一卷僅存目于集中
鼎彝在甥館闔爲江津王虎臣孝廉攜去遂不復存通籍後宦于蜀往來巴渝間訪之數年無所得會李二琪園同年宰江津屬其購諸王孝廉家則虎臣有弟尙收斯卷始知本以居來山名集而玉脂乃晚年所改之名也

亟錄付梓繫于藤花集之後爲第六卷以完其舊兼志其得之之由則李君之力云李名

嘉佑粵西臨桂縣人壬戌進士門聲

吳鼎謹

識

此集原佚今由吳刻本補入吳公諱鼎號

考坡錢唐人嘉慶壬戌進士
敬識 先府君遺硯示廉兒

手澤遺硯有七六一孫各得一硯之孤壁始碎
羈角呱呱眼流血閱卅六年無四壁立祇一研砭
慈母以授兒璧用紹汝父清節璧跪而受鐫刻心
骨祝母曼壽如研斯堅如山如嶽兒心如石如圭
如璋廉隅毋斲

叶

永貽子孫祖德是述

和昌黎短燈檠歌

短檠何短秋夜長夜分兀兀凝青光緣階射砌候
蟲發欲爇不爇生秋涼桁上無衣盎無粟有燈著
壁花照床床頭太息讀書客不信謀生竟無策推
書起視天宇蒼案戶明河大星白後之視今今視
前繁憂輾輾安得眠長檠長檠胡自恣照耀空花
亂春翠仙人燭樹吹作煙區區長檠何足棄

雪夜郊行口號

夢向瑤階月下行相逢人是許飛瓊含春笑語空
千里瑩骨清寒過一生定有雲歸三峽遠那無衣

似五銖輕不知鄧尉梅花色何似燕臺柳絮情

雪夜酌酒與錢待之孝廉同作卽寄任子田

儀曹和之

晚雲鳳凰如石頭羸車跬步愁河關嚴寒鬱勃不
得路風色噤痒催驅還到家如夢未省錄西山已
失雙煙鬢紛紛奕奕不到地長安萬樹堆花鬢連
天尺五凍欲合縱有瑤草誰能攀況我據梧久枯
槁神骨重滯仙緣慳尙思馭風一飛越便似槎客
浮銀灣當年意氣跨霄漢長槩自舞强弧彎雲中
邂逅碧驢客吐來白鳳何嫋嫋

謂任子田只今詰屈閉

颺逕坐想松菊荒茅菅眼中吾子可與語性情嗜
好非塵寰要使清奇入心骨置汝鄧尉梅花間可
憐湖海歸夢遠落落寞寞寒雲間不知夜久雪未
已但聞落筆聲琤潺燈花捻莢裂牕紙橫空意緒
紛難刪問君起舞亦何謂酒懷慷慨詩情艱人生
所遇非一致昏旦飲獵如循環屯邊鐵甲冷徹骨
望歲老農花滿顏惟我與爾有何事窮經高臥眞
無患

送孫有堂孝廉歸綿州用昌谷送沈亞之歌

韻

驪歌宛轉思春風雪花吹作桃花紅珊瑚鞭送爾上
空碧錦官城北青城東檢點笙囊弄雲笈墨痕淚
眼參差夾側身雲棧連天長匹馬孤飛如一葉相
思已到枇杷下蝴蝶翩翩逐歸馬歸去孫卿且賦
鍼茫茫同是雕蟲者城樓詩思樊生骨蒲牢詰屈
長鯨掣勒君更拍洪厓肩頔頔飛霞光鬱律

聽孫有堂度曲疊前韻歌以和之

撲人衣袂吹蘭風書籤歌板紅牙紅低吟細細入
寒碧銀雲不肯流天東蠕蠕粉蠹離花笈衡衡春
深綠槐夾笙篴忽報金釵歸颯颯風沙走霜葉平

生心眼爲誰下渥水騏驎本天馬短歌長笑長歌
悲人間我亦銷魂者斗酒酌君養心骨移情海水
紅絃拌唱出家山雙鳳聲十二峯頭搖不律

同方耕梅前輩盧闕峯劉綱齋蔡澄齋諸君
小憩萬柳堂歸途有作

廣衢門外春蕭騷東風游絲吹伯勞黯然別思耿
塵土少紆歸騎尋空郊壞垣迤邐入颺徑星星亂
放丁香梢危樓欲倒且未倒幾間破屋顛風號野
僧支離作醉語不俚不雅何噉嘈詢之十語九不
會云何於意情殊高當年此地盛文譙淋漓大筆

馳羣豪粘天匝地一萬樹酒酣起舞翻青濤只今
風流盡銷歇伶仃小柳低於蒿其骨已朽樹如此
對此令我心魂消廢池古水亂蛙哭可憐荒落猶
吾曹乃知聚散真一映卽此今日非昨朝紅埃烝
空日卓午解衣可醉無村醪茲遊且不可如意豐
臺紅藥初含苞

插車謠

有引

京師夏多雨泥深沒輓車行塞塗局束輶
中不能轉側方言謂之插車因作插車謠
聊用以自嘲且自解也

大車轟砰旬小車軋勒轆蹄如排礎輪如墻害擊
釭虺相坎圯大車載煤米小車載朝官米囊困積
煤厭山六鰲啣尾來駢闐泥深一尺曳不動小車
觸藩抵大車失水鱣朝官謂大車爾行不過多得
錢假令折而覆贏餘何有焉大車中人笑兀兀我
貨與官同一物蠅頭之利吾何辭雞鳴而起官何
欲吾聞古之人意其所事乃食穀官今蝨其間坎
坎能無愧輪輻侵晨脂車日暮歸枯蠶蠹蠹緣羶
帷連肫結股竟何事乃獨誚讓於我爲我聞斯言
三歎息目瞶舌撝說不得敬謝大車人瞿瞿思所

職大車爲賈小車爲士商慙官廉郅隆之世今日
不爲明日無利驚駘可策各事其事不然曾不如
彼大車脚車夫俗謂之車脚米耶煤耶多載著得錢歸來
載膏秣白酒三杯竟何忤

直宿銓署聞歌口號

閣鈴不動月華明冰署淒然欲二更何處惱人絲
竹肉都來枕上作寒聲

百感中腸獨夜身不關情處也傷神可憐門外寒
星落入戶霜風已撲人

漫與七首

乙未閏十月吳樹堂侍御
招同人讌集劉氏園林作

芙蓉頰頰柳低顏十二屏開見遠山非我佳人誰
解此一時心眼向雙鬟

根根絃索響高秋霜爲停飛月爲留不是三生韓

吏部蹋筵誰與寫明眸

謂韓開
雲考功

青天碧海思飛揚百轉流鶯百和香玉案金刀何
足贈清愁細細與宵長

十年一覺夢青樓團扇西風各自秋一樣琵琶遮
半面銷魂豈獨白江州

忽訝東風刮骨纖華年特爲小春添眼前便有花
如海一丈紅薔拂帽簷

不知今夕真何夕遮莫長歌續短歌共向道場看
法喜天花偏著病維摩

寒星耿耿欲斜河翠羽啁啾別恨多隔座已如天
樣遠蘭臺走馬更如何

續漫興七首

香光欲合醉魂離酒地花天有所思十里重湖三
月半湖山廟裏殢花時

十二年前憶昔遊南屏鐘動月如鉤竺僧歸去雲
鬢老不忍重思舊酒樓

舊思契濶感微波別有新愁唱奈何永夜流連情

似水懊儂聲比惱公多

飄雲抱月學纖柔前向如驚却似羞可是無聊偏
有誤周郎爭忍不同頭

風雲氣入更悲涼敕勒歌翻萬里霜心碎怕聽珠
絡鼓撩人更與唱連廂

花裙戔髻太紛綸墮地嬌雲別樣春辛苦從郎歌
十索梅花賦手屬何人

悟後空花電影浮一聲清磬可憐秋不須惆悵黃
庭誤自有仙人十二樓

離席寄惱韓同年

集玉溪詩十二首
題亦戲集李句

小閣塵凝人語空自今岐路各西東舞鸞鏡匣收
殘黛走馬蘭臺類轉蓬子夜休歌團扇掩翠衾歸
臥繡簾中當時若愛韓公子東望花樓會不同

今宵歌管屬檀郎可惜秋眸一嚮光欲向麻姑買
滄海本來銀漢是紅墻誰言瓊樹朝朝見臥後清
宵細細長寄問釵頭雙白燕幾時塗額藉蜂黃
萬里誰能訪十洲月娥嬌獨好同遊明珠可貫須
爲珮海蜃遙驚恥化樓蠟照半籠金翡翠繡襪迴
枕玉雕鏤豈能無意酬烏鵲瘦盡瓊枝詠四愁
雌去雄飛萬里天碧眉紅頰一千年重吟細把眞

無奈對影聞聲已可憐
貝闕夜移鯨失色
藍田日暖玉生煙
蓬山此去無多路
只是當時已惘然
紫府程遙碧落寬
漫粧嬌樹水晶盤
蝶銜紅蘂蜂銜粉
犀辟塵埃玉辟寒
白日當天三月半
東風無力百花殘
人生豈得長無謂
青鳥殷勤爲探看
雲屏不動掩秋顰
家近紅蕖曲水濱
終日相思却相怨
可堪無酒更無人
紅樓隔雨相望冷
錦瑟驚絃破夢頻
莫訝韓憑爲蛺蝶
不知原是此花身
不踏金蓮不肯來
自埋紅粉自成灰
更無人處簾垂地
尙自露寒花未開
碧草暗侵穿苑路
柳綿相

憶隔章臺羅屏但有空青色遮掩春山滯上才
東閣無因得再窺佳人惆悵臥遙帷自蒙半夜傳
衣後便是孤鸞罷舞時他日未開今日謝清秋一
首杜秋詩玉璫緘札何由達莫遣佳期更後期
只得流霞酒一杯莫將畫扇出帷來未容言語還
分散已欲別離休更開斑竹嶺邊無限淚芙蓉塘
外有輕雷柔腸早被秋眸割一寸相思一寸灰
夫君太騁錦障泥騎馬出門烏夜啼玉骨瘦來無
一把赤簫吹罷好相攜深知身在情長在不是花
迷客自迷一自高唐賦成後碧雲東去雨雲西

白道縈迴入暮霞青陵臺上日光斜峽中尋覓常
逢雨洞裏迷人有幾家誰與王昌報消息獨教宋
玉擅才華維摩一室雖多病三十三天長雨花
雲鬢無端怨別離蕙蘭蹊逕失佳期嗟予聽鼓應
官去分隔休鐙滅燭時半曲新辭寫縣紙十年長
夢採華芝相如未是真消渴羅薦春香暖不知

秋夜和昌黎燈花詩六首

莫吐長虹燄秋宵月正中微慚虛室白那見寸心
紅得氣依金掌垂芒委砌蟲高歌清夜酌唯有杜

陵翁

玉局聲初靜春生漏水中未開心最熱將炮色偏
紅煜煜看蒸菌蝟蝟祇化蟲得錢差不惡笑殺信
天翁

照壁眞加蠅愁人正夜中花纔開頃刻氣已幻青
紅作態爭霄露分光綴網蟲誰知讀書客自有杖
藜翁

搏木金輪湧人間夜始中一龕秋夢綠半壁海霞
紅異氣居牛斗奇文辨鳥蟲如何風露下愁絕白
頭翁

一夜垂垂發秋心細雨中有人工織素對此獨裁

紅玉杼虛隨月寒絲欲動蟲星槎如可託簾下問
嚴翁

今霄何太喜來入我門中薄酒相親綠醅顏訝許
紅多情尋蟾子同夢有秋蟲便欲呼如願挪揄笑
乃翁

先中丞公有春明需役圖舊存外舅錢文端
公篋中蓋自雍正己酉歲由湖北糧道落職
入都尋奉

恩命効力東河需次未行仍與文端公同寓宣武
坊南邸第時所作距今四十有八年矣丙申

秋錢七待之孝廉來京出以示汝嘉汝璧敬
次 先府君同文端公題江船證會圖詩韻
各賦一首用識歲月俾兩家子孫世守不忘
焉

吁嗟孤露兒追維卅載上兢兢奉前徽默默感遐
曠斯圖作何年已酉秋旣望我父罷叅藩江風謝
惆悵重來阿翁居條冰共清況回首鄂渚雲清夢
落秋舫役車時暫羈河流已安漲涉川利用需往
躅驗无妄二客猶相從舊雨雙帆颺先是夢與文
端公同泛瞿
川江旣而文端典楚南試事同作江
船證會圖及入都復同寓又作是圖此地話前塵

驄馬秋花訪對牀老兄弟一夕丹青狀

雍正甲辰先府君以

御史巡視北城文端時任編修同寓宣武坊邸文端有借騎驄馬人知避夜訪秋花犬不驚之句

連檣復今茲顧影似疇曩可憐兩家兒各自引悲
吭述德期無慚撫膺竟誰讓曾讀城南書幸免金
根謗斷蓬空自傷松楸冷巴閩內手詎知寒省躬
但無恙記從阿翁遊舉舉誇陸暢翁沒又三年賃
春不能相錢郎復何如遊屐費幾量弱植憂負擔
短歌增慨忼好續春明圖此意先人亮

方子春歌輓方耕梅前輩

我來銓署十一易草木故人零落如參商三年死

一魯五年死一汪歲非龍蛇日非鵬如何又死虞
山方方子春吾之師高山流水爲情移海濤瀕洞
風何悲方子春吾所友五經紛綸不去口讀書纔
到周秦先論詩肯落齊梁後方子春記子初來時
辛卯日在箕叩門月昏黑兩鬢風絲絲降階揖先
輩借問來何爲謂言十年臥梅里梅花耕老空朝
饑焦拳敝羽爲兒女坐令灰塵滿面生雞皮不如
提攜入京洛輒紅香土重遊嬉翌日乃相訪古寺
寒淒淒啁啾僕婢妻與兒繞樹三匝無枝依旣乃
賃屋連衡楣神仙官府招手相趨追方子春來何

遲激昂老驥千里心唾壺擊碎冰流澌可憐阿婆
低眉學塗抹三五年少相嘲詼惟我小生作強伴
笑君亦能兼此數子連尻脰去年鶴廳得真授執
手往往談歸期自從今歲來當歌對酒神離離方
子春來去何匆匆赫赭日裏老段血凌兢冰上枯
裘風人生無百年況乃六十翁縱然喬與佺瘦骨
難摩礪丈夫死耳何足道可憐完山之鳥號夜月
秋鸞泣雨斑斑紅方子春去何之寒風獵獵寒雲
垂虞山雪凍月如紙老梅瑟縮封苔衣魂兮歸去
相因依仰天大笑紛紛雁鷺終何爲方子春噫吁

嘻

銅梁山人詩集卷第七

淪江王汝璧鎮之

均堂集

均堂集者自甲辰守順德移調保陽以至庚戌春罷職凡七年中所得詩也保陽附省首郡每晨興打鼓趨衙銷磨晷景無所廣益及午散歸則日坐堂皇事推鞠寒暑夜分不輟嘗於靜夜仰覩貫索中空虛無繁星則欣然喜然獄訟卒不得少減鈎棘掣曳不勝煩擾奚暇作詩惟于役載塗或因病休暇輿中枕

上心維口占得數十首不經鑪錘語多率易
而其一二佳處亦漸近自然以其得之毛沙
也不得棄置錄爲二卷亦猶夫芥之舟云爾
若以浮杯焉未知其可也

首春二日自通潞赴省途中口占六絕句

草色微舒飛放泊冰痕漸折鮑邱河不知黍谷誰
吹管已有春風入野歌

攝提正正玉龍升攬轡金堤暮靄澄千點紅燈萬
行柳長河映澈一條冰

夜渡永定河緣堤各村庄
家懸紅燈錯落如火齊

銀幡竹馬一雙雙指點行旌笑且趲到處灰堆傳

好語芝蔴如繖秕如幢村俗於歲除各以芝蔴秕

揀糞堆上

祝豐年也

恰好參中此渡橋北河天上影迢迢玉弓纔挂初

三月瓊佩相逢第一宵

初三夜宿北河

棖棖絃索響簷廊輒語雌雌惱客腸一夜騾綱雜

牛鐸何人解與辨宮商

東風四百里長亭春色隨車眼共青今夜大慈高

閣望燃燈塢火一星星

燃燈古塢在通州

東路李分守送紅梅水仙賦謝二律

昨夜參橫月半彎仙雲冉冉見嬌鬟自持玉骨饒

金華集卷之十一
二
頰頰欲放冰心是醉顏收得精神歸雪屋想他風
貌在春山多生結習銷難盡品格應居夷惠間右
美人香草兩何憑觀色觀空似定僧雪裏相逢矜
綽約燈前並影笑鬢髻綠波遠夢寒無滓碧月深
宵靜有棧多謝潞河窮太守清風相況玉壺冰右
任子田儀部寄題三絕句走筆依韻奉簡

雕鐫出小詩幽象環中得有似潞河魚愛此銀鱗
色

孤冷本同然南宮有老仙莫愁開雪後更喜在春
前

可憐王司仄馬深恐作衙官一樣冰霜色梅花笑

眼看謂少林

附原作

任大椿

平生冰雪心春風消不得須知天地間有此冷
紅色

水石真同性煙波易得仙若非凡骨盡未許到
君前

噓雪成孤詠先春寄冷官故人塵慮在莫作此
花看

聞魚門編修歿於西安卽用其題九客圖詩

韻歌以哭之

白雲西來如素塵於虜吾友魂安歸嶽蓮仙掌相
因依人生死此夫何悲所可惜者吾所師已矣不
復聞良規去年相送秋水湄詩壇老將先舉旂掀
髯躍馬驚突圍今年首春來欸扉談風說雨愁畢
箕高歌祝雪笑且唏我亦對此忘朝饑近作前後
祝雪詩二
篇絕新篇滿束如秉遺泱泱表海之風詩甯知霧

豹空留皮

時自山左歸手抄
近詩二卷見貽

滹沱冰釋春波遲稿

褫鶴氅風恢恢一揖而別車載馳髯之意氣何嘗
衰暫還上國從此辭江鄉歸夢何逶迤老翁行乞

非所宜自求口食當觀頤奈何珠桂貧難醫故人
况復晨星稀債家逐逐爭刀錐白晝排闥如攻陴
乃復出走燕南郵遇我行館櫻筍治日時勿失如
發機菟裘生計不我違草薰陌上花飛時贈我以
瓊瑤乎而和予用昌黎青龍寺韻詩留別陽關高調吹征衣終南
太白邀邀嬉如何長笛悲涼伊臨風剪紙空菲菲
龍蛇厄歲日旻離從今誰復能舉厄嗚呼何以多
文爲

偶讀吳梅村題士女圖絕句效顰爲之殊慙
篆刻也

一舸

一舸鴟夷事渺茫
鴟夷怒浪待沈湘
馮夷合共鴟夷去
生逐鴟夷只慢藏

吳越春秋浮西施于江令隨鴟夷以終謂伍胥也

虞兮

漢兵畧地楚歌噫叱咤風雲不利時
贏得重瞳聲淚盡英雄千古一虞兮

出塞

戎服豐容慷慨行
紅顏何處不聊生
掖庭得請眞知己
青塚留傳恐好名

歸國

十八胡笳劇可哀
四千卷帙待新裁
書生尙論多遺憾
屬國會留通國來

當壚

諭蜀功名諫獵書
遠山早已識相如
未妨放誕憐消渴
賦手琴心亦子虛

墜樓

豈緣奴輩利君財
尤物天生是禍胎
一死報君堪補過
翔風莫上避風臺

石崇愛婢翔風年三十遂退之使爲房老

奔拂

消息陰符美目藏
越公何踞衛公狂
紫衣一夕從

金華山人詩
天降便以雷車走阿香

盜綃

博浪夷門事不同崑崙此亦盜之雄神撻莫笑用
無用還爲千牛得比紅

取盒

五千鐵甲五更風一笑仇頭放手中玉帳不開金
盒去月斜飛度一星紅

夢鞦

恨海難填卽日休鑿天那得到癡牛黃衫浪比雕
陵鵲早不生揮薄倖頭

驪宮

七夕憑肩亦可哈
天宮牛女豈凡才
若知窈窕河洲樂
那有倉黃閭道哀

蒲東

元相當年已不經
王生多事付旗亭
于今戲取二三策
羞有紅孃稱小星

趙州三婦歌

趙州三婦劉于周
熒熒孤獨皆無儔
劉夫棄家而遠遊
廿年不復歸田疇
其村黠者與婦尤
彼雀而角穿我坵
往愬不理鳴於州
鋤而去之理則優
批

婦之類夫何由于家叔姪爭涂溝官杖彼叔叔忿
憂輕身入井如毛輶曹吏喘急圭如牛官曰毋怖
此易酬貫以四緡箝婦喉吁嗟有如魚中鈎維周
之嫠尤難侔厥夫早喪姑老邁事姑撫弱身勸糲
十五畝地爲菟裘詎知姑死土未抔異姓之姪來
蠹蝨恣其蠶食兼鼠偷生不能養死不賙官乃割
地以予仇勾三股四爲分闕嗟哉三婦怨莫讎臥
薪集蓼歷幾秋風天雨夜長喑啾偶然相遇相嘆
咻褰裳乞食趨京雒上訴大理爰諮諏大府檄下
發滯幽俾余勘讞獄不留蚩蚩之氓情易求油然

孝弟生豆區式相好矣罔詬訛三婦稽顙涕泗收
從今安土無牢愁州官已死幸免糾我聞斯語面
汗鳩嗟彼牧者爲民羞

再權通永監司卽事二首

飛鴻踏雪此經行馬首東瞻識舊程小別然燈纔
兩月重來結夏正三庚黍苗彌望依依綠河水分
流亶亶清八里橋頭聊徙倚向人鷗鷺故多情
坐擁天圀拱

帝畿上游左顧接東維神山已覺憑襟肘溟海還
將入酒卮一枕吳歌江月近半簾湘雨楚雲遲龍

驤指日千艘集正是

南薰解愠時

觸熱行

觸熱觸熱車載馳燭龍掣電鞭火螭雨工蜩縮雲
將匿大地一色紅琉璃釜中有蟲火有鼠物各適
適天爲隨而況長羸扇大冶變其毛骨心肝脾我
行中野日方午炎炎赤繖如卓錫僕夫頰面馬汗
血歔歔翕赫交相炊蠅蟲撲緣利嗜噉此瑣瑣者
何足揮道旁老柳鬥奇怪陀羅牛鬼鱗之而天綿
地密潑濃綠迷人如酒如修眉饑蟬百千叫不歇

脅枯羽敝聲嘶嘶不知所謂但助譟蛙黷狼藉翻
羹匙野花斑斑暈猩血日脚下射生紅絲何人搏
取十丈土散作滿地瓊玫瑰獐羊閃目竄颺颺石
虎怒欲吞穹龜叢祠古莽人迹絕瓦餅繙井清漣
漪道人豈識壬癸訣元冰一勺生玉池槐陰笑看
蟻旋磨百二十刻長如葦塵埃萬象自吹息錦囊
摹索眞兒嬉

瓶中荷花二首

湘竹簾垂笛簟舒翛然遠思在江湖誰將太乙青
藜杖縮入仇池碧玉壺坐久嬌雲移翠佩夜深香

雨下仙姝研硃點易還觀象一片秋心正仰盃
月魂邂逅此淹留不用褰裳賦遠遊太華已看落
吾手高花眞箇過人頭涼生白袷塵初淨雲在青
天水不流絕好花藝如鴨綠惜惜澹貯一江秋

七夕雨

今夕知何夕人天有好音洗車連日雨望歲一年
心巧任兒童乞詩從黍稌尋幽圖諸婦子秋思阿
誰深

半月雨不絕連朝陰復重平添瓜蔓水淨洗火雲
峯絕漠無飛鵲移湫有躍龍仙槎何處卜汗漫好

誰逢

雨後病起作

老槐如龍石如虎
膚寸雲興作飛雨
鏗訇衆籟酣
笙鐘修篁獵颯蒼鸞舞
藥囊偃臥何膏騰
尻輪輾轉遭炊烝
忽然雷霆起煩壤
坐覺心骨皆峻嶒
碧玉駢枝添小翠
黃楊却作侏儒戲
一樣秋風有屈伸
再撓靈蓍亦何意

時值
閏秋

惘然涼影生花繁
瞿瞿蟋蟀多古聲
銀河當戶玉几橫
招邀素魄投金觥
橫翠樓用康樂登池上樓韻

巍樓切龍角空秋竝鸞音雲漢互吞吐陰陽遞升

金華山志
沈遠景忽此駐浮翠若難任衡衡交井井軒蓋馳
林林兩載望衡宇尺步迷登臨遐矚空緬邈高懷
自崎嶇夜鐘聞于天曉鶴鳴在陰沈寥隔飛雨莽
藹來翔禽臥病澹羣慮夢遊得長吟呼吸上千仞
揮霍攝寸心逍遙豈異昔汗漫匪自今

蓮花池用康樂遊南亭韻

石扉朝夕闔衙鼓東西馳繫予風滿襟鑒此水半
規壺中自幽獨門外多路歧九河異厥派一畝滙
我池盪胷雲霞蟠濯手星月移蓉裳暮江冷蘿帶
空山垂相思日已遠流覽忽在斯文儵躍清藻元

鶴棲孤崖物情各有適獨往誰能知

納涼口號

一片魚雲暑雨殘商風細細度林端素馨花外紅
藤席臥到三更看月闌

渡河白蹕動然疑愁雨愁風問畢箕

時聞猪龍
河水漲無

那青蛙鳴到曉不知是否爲公私

復雨

纔聞乾鵲報新晴又見頑雲挾雨行天外飛濤來
有信風中濕鼓去無聲莫教積潦誇秋水要使良
田得晚耕昨日滎塘已親酌龍神好自返滄瀛

喜晴

曉看日脚散氤氲早識天心息衆紛
大火今年纔得歲斜河昨夜尙看雲
鯨濤拍岸過三伏蟹堦宜禾定十分
真與吾民同疾苦芎藭麥麴未停薰

方病起

雪夜渡恒水入大茂山搜捕逆匪段文經用
東坡北臺韻

寒芒霍霍玉纖纖劍氣凌空共冷嚴
待看奔塵餘死骨笑他飲羽是形鹽
曩時灞水吟驢背絕勝梅花壓帽簷
此夜招搖正西指天風飛鞚嶽山尖

銜枚肅肅不驚鴉笑挽威弧射鬼車組練彌山眞
若月鸛鵲作陣恰如花六丁自索陰山窟三白頻
歡野老家草底咻咻有寒色鸛拳一擊勝矛叉

漁莊贈別雄縣令劉遂樓

半畝漁莊古道邊喜無陽鱗到車前連天水淀通
瀛鄭一握寒雲界趙燕好看魚叉爭叫嘯莫教狐
尾得延緣近聞逆匪段文經竄入微山湖與君片
刻濠梁話有鳥飛來是信天

三月三日靈雨寺送客漫成一律

眼明新水碧粼粼小立招提送遠津杜曲有情逢

上巳蘭亭無伴負三春
浦裊草色空牽思撲面楊
花不識人尙喜知時來
好雨麥苗細細浣輕塵